

東莞 鄧淳 粹如編輯
香山 鄭廷棣 常蔭參訂

閨閣上

温媪

昔有温氏媪者端溪人也居常澗中捕魚以資日給忽於水側遇一卵其大如斗乃歸置器中經十許日有一物如手掌長尺許穿卵而出媪因任其去留稍長五尺便能入水捕魚日得十餘頭再長二尺許得魚漸多常遊波中潏洄媪側媪後治魚誤斷其尾遂逡巡而去數年乃還媪見其輝光炳耀謂曰此龍子也今復來也因得之蟠旋遊戲親馴如初秦始皇聞之曰此龍子也朕德之所致詔使者以赤珪禮聘温媪媪戀土不以為樂至始安江去端溪千餘里龍輒引船還不踰夕至本所如此數四使者懼而止卒不嶺南叢述 卷二十六 閨閣

能召媪媪殞葬於江陵龍子常為大波至墓側縈浪轉沙以成墳

士人謂之掘尾龍南人為船為龍掘尾即此也太平寰宇記温媪者即

康州悅城縣孀婦也績布為業嘗於野岸拾菜見沙草中有五卵

遂收歸置績筐中不數日忽見五小蛇殼一班四青遂送於江次

無意望報也媪常濯浣於江邊忽一日魚出水跳躍戲於媪前自

爾為常漸有知者鄉里咸謂之龍母敬而事之或詢以災福亦言

多徵應自是媪亦漸豐足朝廷知之遣使徵入京師至全義嶺有

疾卻返悅城而卒鄉里共葬之江東岸忽一日天地冥晦風雨隨

作及明已移其冢并四面草木悉移於西岸矣嶺表錄異

珠崖二義

珠崖二義者珠崖令之後妻及前妻女也女名初年十三珠崖多

珠繼母連大珠以為繫臂及令死當送喪還法內珠入關者死繼

母棄其繫臂珠其子年九歲好而取之置之母鏡臺中皆莫之知

遂奉喪歸至海關關候士吏搜索得珠十枚於鏡奩中吏曰誰當坐者初在左右顧心恐母之置鏡奩中乃曰初當坐之吏曰其狀何如對曰君不幸夫人解繫臂棄之初心惜之取而置夫人鏡奩中夫人不知也繼母聞之遽疾行問初初曰夫人所棄珠初復取之置夫人奩中初當坐之母意亦以初爲實然憐之乃因謂吏曰願且待幸無効兒兒誠不知也此珠妾之繫臂也君不幸妾解去之而置奩中迫奉喪道遠與弱小俱忽然忘之妾當坐之初固曰實初取之繼母又曰兒但讓耳實妾取之因涕泣不能自禁女亦曰夫人哀初之孤欲強活初身夫人實不知也又因哭泣泣下交頸送葬者人亦哭哀慟傍人莫不爲酸鼻揮涕關吏執筆書効不能就一字關候垂泣終日不能忍決乃曰母子有義如此吾寧坐之不忍加文且又相讓安知孰是遂棄珠而遺之既去後乃知男獨取之也君子謂二義慈孝論語曰父爲子隱子爲父隱直在其

嶺南叢述

卷二十六

閨閣

二

中矣若繼母與其女推讓爭死哀感傍人可謂直耳

劉向列女傳

洗夫人

錦織夫人之先茂有洗氏秦始皇時人也身長七尺乳長二尺餘當暑而行則將兩乳掀搭肩上秦末四海兵起洗氏集兵保守高涼諸郡鄉人賴之及趙佗割據五嶺洗氏乃歸佗齎軍裝器物二百餘擔入覲佗大喜與之論兵法及時政得失智辯縱橫莫能折佗遂以高涼委任之令其歸治乃明賞罰著恩威鄰境懾服余於逸志見之竊有感曰二洗均女子耳其勇畧才識保障功業皆同而一則以功名顯廟食百世不絕一則湮沒而名不傳豈非趙佗僞號而陳隋唐皆正統歟然則人之所託有幸不幸也

嶺南叢述見聞

譙國夫人

譙國夫人洗氏諡誠敬亦高州人其家世爲南越首領轄部各一萬餘戶夫人幼而賢明曉兵畧善撫諸蠻羅州刺史馮融聞其賢

爲子馮寶求娶焉侯景反高州刺史李遷仕召寶寶欲往夫人止之既而遷仕果反夫人自將千餘兵步擔雜物唱言輸賦至柵下襲擊遷仕大破之遂與陳霸先會於贛石還謂寶曰陳都督非常人也厚資給之及寶卒嶺南大亂夫人撫綏百粵數州晏然永定二年其子馮僕年九歲遣率諸首領入朝拜陽春郡守後廣州刺史歐陽紇召馮僕至高安誘與爲亂僕遣使歸告母發兵拒之紇潰敗詔封洗氏石龍郡太夫人陳亡隋高祖着陳主遺夫人書卽遣孫馮暄帥兵迎隋總管韋洸嶺南遂定未幾番禺人王仲宣反圍洸於廣州夫人攻破仲宣巡撫諸州高祖冊封洗氏譙國夫人開幕府置官屬給印章便宜行事八十歲卒夫人智勇兼備從無敗衄每戰必錦繖寶幟望見咸以爲神高州人立廟祀之北史今雲南廣西等處土官無嗣者妻女代職謂之母土官隋有譙國夫人洗氏高涼太守馮寶妻也其家屢葉爲南越首領夫人能行軍用

嶺南叢述

卷二十六

閩閩

三

師歷服諸越後以功致封爵此女土官事始但夫人父家有兄夫家有子與今不同耳菽園雜記

虞夫人

虞夫人英德麻寨人唐時黃巢破西衡州流劫嶺南其夫爲寨將與巢賊酣戰而死虞綽鎗上馬接戰殺敗黃巢今麻寨逕中有拖鎗痕焉虞亡後鄉人徐志道等立祠祀之嗣是賊寇竊發卽見虞夫人朱衣白馬提兵出入空際賊輒驚潰旱澇疾疫祈禱必應宋嘉定十五年敕曰生能抗黃巢之鋒歿能制峒寇之暴况雨暘之致祈復利澤之隨著特封爲顯佑夫人後加封正順夫人黃志

李夫人

李夫人雷州人勇敢有謀眾皆欽服推爲主帥僞南漢殘黨剽掠皆爲李氏兵所敗一方賴之號寧國夫人祀於雷州黃志

詹夫人

詹夫人東安人李漆之妻也漆集兵勤王以總兵戰歿詹氏代領其眾攻復瀧東西州縣叙功得授參將未幾病卒吾粵辰山襟海素饒雄霸之氣婦女亦多知兵自二洗以至虞李詹皆勇畧絕倫稱爲粵中五女將云粵中見聞

趙姬

趙姬者乳長數尺不嫁人入山着金鞮履交州吳赤烏間茂有趙姬者勇敢善戰年長不嫁入山招集亡命數千人攻掠城邑其鋒不可犯真女中盜跖也常着金鞮踈出戰退張帷幙驍悍少年數十人列侍左右軍令森然後安南校尉陸允結以恩信而招納之郡邑始平嶺海見聞

製鑿鑑圖女子

唐上元初南海女子所製有鑿鑑圖名曰轉輪八花鈎枝鑑銘凡一百九十二字迴環讀之四字成句其構思精巧寓詞箴規似有

嶺南叢述

卷二十六

閩閩

四

得乎風人之旨可與蘇若蘭璇璣圖范陽楊氏天寶迴文詩並傳舊有王勃序云上元二年歲次乙亥十有一月庚午朔七日丙子予將之交陟旅次南海有好事者以轉輪鈎枝八花鑑銘示予云當今之才婦人也觀其藻麗反覆文字縈迴句讀曲屈韻調高雅有陳規起諷之意可以作鑑前列輝映將來者也昔孔詩十興不遺衛姜江篇擬古無隔班媛蓋以超俊穎拔同符君子者矣嗚呼何勒非戒何述非才風律苟存士女何算聊撫鏡以長想遂援筆而作叙太原王勃撰復有令狐楚跋云元和十三年二月八日子爲中書舍人翰林學士夜直禁中奏進旨檢事因開前庫東閣於架上閱古今撰集凡數百家偶於王勃集中卷末獲此鑑圖并序愛玩久之翼日遂自摹寫貯於箱篋寶厯二年乃命隨軍潘元敏繪於縑素傳諸好事者太原令狐楚記廣語

七歲能詩

如意中女子年七歲能吟詩則天試之皆應聲而就其兄辭去則天令作詩送兄遂賦云別路雲初起離亭葉正稀所嗟人異雁不作一行歸唐宋遺史

劉三妹

新興女子有劉三妹者相傳爲始造歌之人生唐中宗年間年十二淹通經史善爲歌千里內聞歌名而來者或一日或二三日卒不能訓和而去三妹解音律遊戲得道嘗往來兩粵溪峒間諸蠻種類最繁所過之處咸解其言語遇某種人卽依某種聲音作歌與之倡和某種人奉之爲式嘗與白鶴鄉一少年登山而歌粵民及獠種諸種人圍而觀之男女數十百層咸以爲仙七日夜歌聲不絕俱化爲石土人因祀之於陽春錦石巖巖高三十丈許林木叢蔚老樟千章蔽其半巖口有石磴苔花繡蝕若鳥跡書一石狀如曲凡可容卧一人黑潤有光三妹之遺跡也月夕輒聞笙鶴之

嶺南叢述

卷二十六

閨閣

五

音歲豐熟則彷彿有人登巖頂而歌三妹今稱歌仙凡作歌者毋論齊民與狼獠獠人山子等類歌必先供一本祝者藏之求歌者就而錄焉不得攜出漸積遂至數篋兵後今蕩然矣廣語

武婆婆

廣右人言武后母本欽州人今皆祀武后也冠帔巍然眾人環坐所在神祠無不以武爲尊巫者招神稱曰武太后娘娘俗曰武婆婆也嶺外代答

玉英

符鳳妻某氏字玉英鳳以罪徙儋州至南海爲獠賊所殺脅玉英私之對曰一婦人不足事眾男子請推一長者賊然之乃請更衣有頃盛服立於舟罵曰受賊辱不如死遂自沉於海唐書本傳

黎母

桂海虞衡志云黎母之顛雖生黎亦不能至相傳其上有壽考

逸樂不與世接虎豹守險無路可扳但覺水泉甘美絕異爾初疑其言近聞之熟黎者曰村代生一壽婦主諸岐已嘗至山下有淵泉極甘旁皆果殼鳥羽盡中原所有者余方知石湖之言或有據也歧乃生黎黎中荒昧不服王化者也歧當作也海槎餘錄瓊州府城西故有黎母廟相傳雷攝一卵於山中生一女有交趾人渡海采香因與婚子孫眾多是爲黎母亦曰黎姥蓋黎人之始祖妣云黎本鳥獸之民其種性自卵而來固與人殊自古至今宜王化所不能及也廣語

送老

嶺南嫁女之夕新人盛飾廟坐女伴亦盛飾夾輔之送相歌和含情淒惋各致殷勤名曰送老言將別年少之伴送之偕老也其歌也靜江人倚蘇幕遮爲聲欽人倚人月圓皆臨機自撰不肯蹈襲其間乃有絕佳者凡送老者在深夜鄉黨男子羣往觀之或於稠

嶺南叢述

卷二十六

閩閩

六

人中發歌以調女伴女伴知其謂誰亦歌以答之頗竊中其家之隱慝往往以此致爭亦或以此心許諸本代答

黃道婆

閩廣多種木綿紡績爲布名曰吉貝松江府東去五十里許曰烏泥溼其地土田磽瘠民食不給因謀樹藝以資生業遂覓種於彼初無踏車椎弓之製率用手剖去子綿弦竹弧置按間振掉成劑厥功甚艱元初時有一媪名黃道婆者自崖州來乃教以做造捍彈方織之具至於錯紗配色綜綫挈花各有其法以故織成被褥帶帨其上折枝團鳳棊局字樣粲然若寫人既受教競相作爲轉貨他郡未幾媪卒莫不感恩洒泣而共葬之又爲立祀歲時享之越三十年祠毀鄉人趙愚軒重立今祠復毀無人爲創建道婆之名日漸泯滅無聞矣輟耕錄

媚猪

劉錕昏縱角出得波斯女年破瓜黑脂而慧艷善淫曲盡其妙錕
嬖之賜號媚猪清異錄

割股婦

有李昌期妻者何氏東莞人鄉貢士何漢臣女也舅姑有疾割股
煉糜以進疾尋愈鄉人嘉異之夫逝守節三十年乃卒宋咸淳十
年邑令袁夢冊爲立孝婦坊景炎二年旌表門閭賜束帛元初重
建孝節坊永嘉梅時舉曰昌黎嘗辯鄆人旌門爲非禮嗚呼人有
不愛其身起親疾於垂死乃以不孝律之俾於好勇鬪狠同科爲
善者懼矣仲尼曰有殺身以成仁親親仁也苟可報罔極之深恩
緩終天之鉅痛雖生有所不愛於尺寸之膚何愛焉捐父母生我
之身以還父母一念之烈雖通神明感天地可也如慮其因毀滅
性則自古皆有死鮮聞以割股死者不惟不死父母疾鮮不因以
瘳者天且弗違而况於人乎旌之宜也抑又有說子事父母婦事

嶺南叢述

卷二十六

閨閣

七

舅姑一也父子之合以天自襁褓已知有父母至親也夫婦之合
以人筭而嫁始知有舅姑由疎而親也事至親而不自愛其體膚
非人情所難由疎而親雖體膚不敢愛此人情之至難也唐房元
齡妻則目五代李氏斷臂此各爲夫爾史尚夸詡爲奇節如何氏
爲舅姑割股當進於房李一等不謂之孝可乎夫逝時世方瀕洞
何守志堅厲嘗裝遣族女之孤者傾囊筭捐簪珥絕無靳色是不
惟知有孝且知有節與義者也嗚呼賢哉廣語

劉氏二女

劉氏二女其母久病一割肝一剔股以奉之母乃瘳連帥龔茂良
上其事詔卽所居立雙闕宋乾道中時事也南海百詠

羅浮女道人

羅浮女道人素月嘗募種梅千本於梅花村雅能詩有云玉女峯
頭人冷笑杜蘭香去嫁人間廣語

春夢婆

春夢婆家居儋城之東年七十餘常負大瓢行田野間口歌哨遍方饑食遇蘇文忠公曰世事何如婆答曰世事只如春夢耳公復曰何如婆曰富貴一場春夢耳公曰然因號為春夢婆有詩曰投梭每困東隣女換扇還逢春夢婆是日老符秀才言換扇事侯麟錄

朝雲傷春

子瞻在惠州與朝雲閒坐時青女初至落木蕭蕭悽然有悲秋之意命朝雲把大白唱花褪殘紅朝雲歌喉將轉淚滿衣襟子瞻詰其故答曰奴所不能歌是枝上柳綿吹又少天涯何處無芳草也子瞻翻然大笑曰是吾政悲秋而汝又傷春矣遂罷朝雲不久抱疾而亡子瞻終身不復聽此詞林下清談

青梅價高

元帥陳謙亨家有侍婢名青梅通詞翰善歌舞聲色并麗至治間嶺南叢述卷二十六 閩關

文宗至潛邸慕之嘗視其家以覬窺之意不就因賦詩云自笑當年志氣豪手攀銀杏弄金桃滇南地僻無佳果問着青梅價也高瓊州府志

蔡氏二貞女

蔡氏二女瓊山人父克憲疊山仁政翼千戶長曰九娘喪父越三十不嫁元亂統父兵保境東寇陳子瑚陷郡聞其智而有色欲娶之九娘逃入補錦巖被熏死舊傳子瑚至設酒迎之子瑚醉乘間逃入錦谷子瑚醒賦詩云一笑花前醉似泥綺筵歡劇不聞鷄馬蹄到此空歸去不是花迷是酒迷惆悵而歸九娘死巖中谷名與熏死皆不同一說避本部都帥陳乾富其妹嫁遵都王和守寡子瑚主簿邱田欲褫之不屈自縊死瓊州府志

金貞婦

貞婦姓耿氏瓊州人歸外舅金用和翁未三閱月翁以事渡河暴

風卒起同舟皆溺報者謂翁已死貞女亟入室以首飾服器管鑰之類盡付翁妹卽閉門自縊已而翁歸而貞婦氣絕適名醫徐公美聞哭聲入視之心尙微溫依法救之良久始甦德性姿容工巧賢慧爲瓊婦女冠間與翁談論古今援引皆有證據翁或不知也及翁罹奇禍往會府貞女避難於民間爲彼所得將舁入城貞婦曰昔王凝之妻爲逆旅主人所持卽斷其臂而吾以目視惡人可乎不如死之爲愈也卽瞑目不食者數日彼懼乃舁還其家氣已垂絕矣開目謂翁妹曰吾分死矣汝可語汝兄善視兒女言訖而卒

瓊臺會稿

陳烈母

陳烈母者東莞人宋幼帝駐蹕厓山母命其子李佳應詔勤王與之決曰汝宜竭忠勿以老人爲念佳旣行烈母亦趨廣州至黃木灣自沉死佳赴行在得潮州教授而還哀隕莫及乃築望親臺於嶺南叢述

卷二十六

閩閩

九

周氏

海康朱克彬妻周氏早寡無子周慮不免父母之命強暴之虞且獨生無所倚賴遂死以殉夫事聞褒表

元史本傳

墜樓婦

有林氏婦者新會塘下村林子昭之女也適隣村某寇主婦與其稚弟在樓中樓高六七丈甚堅寇攻樓未下欲焚樓女曰姊弟俱死則父嗣絕矣負其弟於背從樓上覆身墜地頭面並裂而死卒存其弟過者稱其樓曰孝烈樓

廣語

莊氏赴水抱屍

莊氏海康吳金童妻成化初廣西流寇掠鄉邑莊隨夫避新會傭

劉銘家銘見莊美欲犯之屢誘不從乃令黨梁狗同金童入海捕魚沒水死越三日不還莊求之海濱屍浮岸側手足被縛腫腐莫可辨莊以衣識之歸攜女赴水抱夫屍而沒翼日三屍隨流達銘門去而復還土人感異殯祭之然莫知銘殺也後梁狗漏言有司並捕考處以極刑明史本傳

鄧氏

海康陳太賓妻鄧氏嘉靖庚申避賊匿於新倉窟賊搜出之不從刃其左臂厲聲曰吾臂可斷志不可奪賊刺其胸而死後太賓徙居錦囊倭寇犯城亦禦賊死一統志

錦桂女

歐氏女錦桂連州人其父紹裕以女許賈繼保將行而繼保卒錦桂易服奔喪自矢守節鄰婦勸之剪髮斷一指以拒家貧手植花果紡績自給有司屢旌其門以細女紅布答之年八十卒論者謂

嶺南叢述

卷二十六

閨閣

十

婦而守志者禮因於情女而守志者情生於禮昔王文肅之女曇陽許字徐氏子徐早死曇陽為之縞素文肅曰爾尚未事徐何以服為曰隆慶皇帝賓天士庶哭臨豈皆食君之祿耶未嫁而可為夫服則亦可為夫守矣嗟夫女之節也所以成仁易有節卦為女之仁者而言有恆卦為婦之仁者而言錦桂曇陽其皆女之仁者哉廣語

何節婦

何氏東莞人潛貢進士張一龍妻生一子秉陽甫晬而一龍卒有黃同知者至邑利其貲欲勢娶之何衰服攜幼子哭於市截髮務面誓死不辱罄其貲乃免秉陽尋殤育猶子寶大為嗣邑人高之其女弟亦以孝節著黃志

陳司綵

陳司綵字瑞貞番禺人陳仲韶女容貌端莊在乳不啼晬日設物

驗之左取印右取筆兩能言窺父書指教數字皆不忘至六七歲示以女工過目卽曉從遊女師聞愛親敬長之言必反覆詳問孝經內則烈女傳諸書莫不潛心研究深居閨閣洪武二十年選入宮瑞貞精六體字明大義精女工嬪嬙皆師事之洪武二十四年命爲司綵賜歸省給祿養其家永樂召復司綵原職年四十病卒

中使護葬

黃志

王司綵

王司綵亦番禺人永樂二年選入官年少兼有才色權貴妃方見幸特推同輦之愛固辭曰臣嫠婦也安敢充下陳哉上重之亦從其志所作宮詞清麗蓋宋昭容之流而持操過之有宮詞云瑤花移入大明宮旖旎濃香韻晚風羸得君王畱步輦玉簫嘹唳月明中

黃志

黃女官

嶺南叢述

卷二十六

閨閣

十一

黃女官名阿妹順德人大學士梁儲母黃太夫人外祖姑也太夫人未字時極荷女官鍾愛洪武二十年選入後官太祖命司寶錫勅命賜名惟德寵眷甚隆宣德七年乞骸南歸太后爲詩賜之後太夫人命少子參政億主其祀事

五山志林

郭貞順

郭媛名貞順潮陽人周伯玉妻幼淑慧受書於父通經史精數學能詩文居無惰容一日櫛縱伯玉從外入郭怫然起曰君子將上堂聲必揚妾方散髮失容君猝至使人難避何義也伯玉愧赧謝之值元亂先避居溪頭寨明太祖命指揮俞良輔南征寨人向未內附懼誅郭作引遮道進之俞覽畢大喜釋其寨不征其引云將軍開國之功臣早附鳳翼攀龍鱗烟雲慘淡蔽九野半夜捧出扶桑輪前年領兵下南越眼底羣雄盡流血馬蹄帶得淮河水洒向江南作晴雪潮陽僻在南海濱十載不斷干戈塵客星移處萬里

外天子亦念遐方民將軍高名邁千古五千健兒猛如虎輕裘踏地來不減襄陽晉羊祜此時特奉明主恩金印斗大龜龍文大開藩衛制方面期以忠義酬明君宣威布德民大悅把菜一筭誰敢奪黃犢春耕萬隴雲鼇龍夜卧千秋月去歲壺陽戍守時下車愛民如愛兒壺山蒼蒼壺水碧父老至今歌咏之欲爲將軍紀勲績天家自有麒麟筆願屬壺民歌太平磨崖勒盡韓山石後卜居縣西夫妻偕隱生碣礪礪三子幼卽分授三經夜誦各與百錢置銅盤紀其數雖熟誦必錢盡乃已後皆爲名儒礪終朝列大夫郭壽百一十五歲子孫遵其遺教喪不供佛祭不焚楮詩書不替粵中見開

葉女官

女官葉氏少有淑質通列女傳洪武二十四年聞其孝敬選入官擢爲女官因召其父碧山弟祖道詣闕賜宴俱授錦衣衛鎮撫資以幣免子孫永遠差役黃志

嶺南叢述

卷二十六

閩閩

十二

屈美人

屈美人者番禺人洪武二十二年選入官擢爲美人屈氏有才德奉侍恭謹上恩寵之甚厚召其父母兄弟詣闕宴賚有加復遣官送歸廣語

徐亞長

徐亞長東莞徐添男女添男爲徐姓僕生亞長四歲而死母以亞長還主而別適比長貞靜寡言笑居羣婦中凜然有難犯之色家僮進旺欲私之不可亞長奉主命薙草豆田中進旺跡而迫之力拒獲免因哭曰聞郎君讀書有寡婦手爲人所引斧斷其手况我尚女也何以生爲遂投江死明史本傳

尸逆流

東莞葉其瑞妻王氏夫操舟爲生歲大祲計無所出私鬻土於博羅券成泣語王故且示之金王知無反理佯喜謂夫曰得此亦足

自活吾行矣善自愛遂毅然登舟及至寶潭忽躍入潭中舟人惶遽走報其瑞其瑞從上流號哭奔赴尸躍出去所沒處逆流已數十步若相迎者人皆異之

一統志

洗母

南海洗王事桂奇母陳氏性方正不喜世俗非鬼之祭聞魏督學校毀諸淫祠亟取先人舊所崇奉佛像投諸水火妯娒中有怵以禍者陳氏曰有禍吾自當之桂奇字少汾以理學稱蓋得其母之訓云

廣語

躍入焰中

南海梁紀慶妻周氏紀慶墮崖死周矢志養姑比姑卒貧不能葬因併夫柩焚之薪既熾奮身躍入焰中死

一統志

嶺南叢述

卷二十六

閩閩

十三

嶺南叢述卷二十六終